

Basef Ifimba Jon Nanda'afi Fagali'i

Basef bandafi fagali'i Jon nanda'afi

1:1-4 Jon na'i basef Godi nasa'ma ukup asasipi
ma sandagala

1:5-2:29 God anen nogogala'i. Ea' apa'
mondafe' mogogala'i ma monda' waf usi'ifi
ukup pigapigaila epes hiasi hi'indalas

3:1-24 Apa' mape awasi Godi. Ea' dei' apa'
ukup pindapindaila sahin owan ape'isi. Apa'
epes awasi mini'ap Seteni sanda' waf awafi
atapis.

4:1-6 Apa' mowaloga ambagof hiagufi
hi'indalagofa mogogawa agwafomba Godi
a'a Satani.

4:7-5:21 God nasapa' nogamana ananiai nafi'i
itap apa'e nihimba'mapa waf ukup pagapa-
gailasafi. Ea' mohapifana ma mogape sisi-
hipama anen atona mogofa' ambal namili.

Basef ambal namili lagapaifi

¹ Afa' wanda' basef ifimba ma anona aman
agilinama Basef, anen nagaso'apa ambal
namili lagapaipai. Aman anamba fowa' gani
dambadamba nagapani. Afa' wame' basef
ananifi ea', watolona naep afa'ipi wahapilana
lagof afa'igufi.* ² Ambal alamba namili lataga
ea' afa' watolol naep afa'ipi. Isimba atis dei' afa'

* ^{1:1:} Jo 1:1-2,4,14; 1 Jo 2:13-14

wawalipipa ma ambal alamba lagape dondol liflafii. Ambal alamba fowa' lape laloma Ahamapa ea' dei' lataga alihigima watolol. ³ Hiahaom amamba afa' watolom wagame'ami dei' wa'ipipam ipa' wapani ma pegape nembel atotombel pegalomafa. Afa' wape wambota atota waloma Ahamapa nagaloma Nogamana ananinai Jisas Krais.* ⁴ Afa' wanda' basef ifimba ma atiasi dagala ape'ini negataga lu'win si'ina apa'.*

God anen nogogala' nanda' waf bu'wafi usi'ifi atifi

⁵ Basef ifimba afa' wame'anamef na'amba. God anen nogogala' afitinai. Ina anota akot tailana kwasakwasala, owa'atin endilisi.* ⁶ I'i apa' mi'i mape nembel atotombel malomana, ama apa' ata' mape manda' waf awafi si'i magape akot atotai, apa' mambaso'ma apa' atepa ma basef ape'ifi faloma fe' ape'ini.* ⁷ Anen nogogala' afitinai. I'i mope mogala' si'i anen waf awafi akapa, ea' mope nembel atembel moloma sahin owan hiasi. Ea' esimbel Jisasi Nogamana Godi basa'opa waf awafi ape'ifi hiafi hi'alaf, ea' mataga be'epa.* ⁸ I'i apa' mi'i waf awafi akapa, apa' mambaso'ma apa' atepa ea' basef endilisifi ina fapaepa, owa'atin. ⁹ I'i apa' mowalapa waf awafi ape'ifi alihif, atiasi anen nokwahomapa waf hiafi awafi ape'ifi okom maso'anafa nosa'opapa mogataga be'epa hilili!.

* **1:3:** Jo 16:24 * **1:4:** 1 Ti 6:16; Je 1:17 * **1:5:** 1 Jo 2:4

* **1:6:** Jo 3:21; Ais 2:5; Hi 9:14; Re 1:5, 7:14 * **1:7:** Sam 32:5; Pro 28:13

Basef fowa' nagala' lapafi ea' nilif nonda' waf usi'ifi datima. ¹⁰ I'i apa' mi'i, "Apa' owa' monda' waf awafia", apa' mofala God ma'i anen aman naga'i basef baso'afii. Ea' basef ananifi ina fape opalef ape'ilifi, owa'atin.

2

Krais aman nagatopalopapai

¹ Ipa' alipipai ae'ipai, ae' okom maimailipa, anda' basef ifimba fafe'mago ipa' ma ina penda' waf awafi, owa'i. Apa' i'i anin epen nenda' waf awafi, anin anona nogatopalopani nape. Anen Jisas Krais bo'ona hilili'i. Anen nohali' Ahamana ma nogakwahoman waf awafi epen inimba okom moso'anaf.* ² Anen atona nahagofa okom numbutinai Godi naga' nakwaha waf awafi ape'ifi. Apa' ina nakwaha waf awafi ape'ifi atef, owa!. Anen nakwaha waf awafi ma epes hiasi itapasi okom maso'anaf. ³ I'i apa' mila basef Godi banagafi, apa' mogawana endilisi.* ⁴ Epen ami ni'i, "Ae' egawa God andeande!", ama anin owa' nila basef Godia, anin nagambaso'ami. Ea' basef endilisifi ina fape opaf ananifi, owa!.* ⁵ Apa' epen ami nila basef ananifi, anin okom pelele' si'im maila God endilisi. Apa' magawa apa' mape sisihipama God na'amba. ⁶ Epen ami ni'i, "Ae' ape sisihiwi ma God", fe' ananini nendataga usi'in si'i fe' Jisas Kraisi.*

* **2:1:** Jo 1:29, 11:52; Kl 1:20; 1 Jo 4:10,14; Hi 7:25, 9:24 * **2:3:** 1 Jo 1:6,8 * **2:4:** Jo 13:15; Jo 14:21,23; 1 Jo 4:12,17; 1 Jo 5:3 * **2:6:** 2 Jo 5:6; 1 Jo 2:24, 3:11

*Epen ami okom mogamogaila sahin owan
ananisi, inimba nape mogogala'i*

⁷ Alipipai ae'ipai, ae' okom maimailipa. Dei' ae' anda' basef ifimba fafe'mago ipa', ina anin mu'uli dambaini, owa'atin. Ae' a'ipipa mu'uli inimba atin fowa'ini, fowa' dambadamba pege-gawani. Mu'uli inimba basef ipa' pagame' ea'li.*
⁸ Apa' basef banagafi ma mu'uli inimba dei' anda'ef fagafe'mago ipe'i, ifimba dambaifi. Ea' fataga alihifa Krais nagi'mif dei' ipa' wapani pagi'mif. Dei' main, akot dei' ta'i pele'etata ea' mogogala'i endilisimi mataga mape ea'!*

⁹ Epen ami ni'i, "Ae' ape mogogala'i," ama anin opaf aofa sahin owan ananisi, epen inimba ata' nape akot atapin.* ¹⁰ Epen ami okom magamagaila esis sahin owani, anin nagape mogogala'ii. Ea' epen inimba ina ata' anef waf awafi fapain fanda'an newa, owa'atin.* ¹¹ Apa' epen ami opaf awasifa sahin owan ananisi ni'i bousi, epen inimba ata' nape akot ea' nafe' akot atona nasopama naep ananipi. Ea' ina nati ufia'w negawa'w, owa'atin.* ¹² Ipa' awasi ae'ipai, God nakwaha waf awafi ipe'ifi hi'alafa agol Kraisi okom maso'anaf. Isimba atis dei' anda' basef ifimba fafe'mago ipa'!* ¹³ Ipa' ahape, apegawa aman anamba andeande' fowa' dambadamba nape atapina. Ea' dei' anda' basef ifimba fafe'mago ipa'. Ipa' amam sa'upai, ipa' patofa wandafa aman aunai pikila'ana. Isimba atis dei'

* **2:7:** Jo 13:34; Ro 13:12; Jo 1:9 * **2:8:** 1 Jo 3:10,15; 1 Jo 4:20

* **2:9:** Jo 11:9; Ro 14:13 * **2:10:** Jo 11:10, 12:35 * **2:11:** 1

Ko 6:11 * **2:12:** 1 Jo 1:1

anda' basef ifimba fafe'mago ipa!. ¹⁴ Ipa' awasi, apegawa Ahamapa andeande!. Ea' dei' anda' basef ifimba fafe'mepago. Ipa' ahape apegawa aman anamba fowa' dambadamba nape nafi'i nafi'i atapina nape. Isimba atis dei' anda' basef ifimba fafe'mepago. Ea' ipa' amam sa'upai, ipa' banagipai ma penda' waf bu'wafi. Ea' basef Godi fagape nomon opalef ipe'ilifi dei' patofa wandafa aman aunai pikila'ana. Ea' dei' anda'ago basef ifimba ma ipa!.*

Apa' ina a' ukup pipila waf itapafi, hapaifi

¹⁵ Ipa' ina a' ukup pipila waf itapafi o anis hiahawes awasisi sagape itapi, owa'i. I'i ipa' ukup pigapigaila waf itapafi, ipa' ina ukup paipaila Ahamapa, owa'atin.* ¹⁶ Apa' mogawa epes saloma hiahaom hiami magape itapi amamba na'amba. Hiahaom amamba opalef apimi mogohafemami maloma epes saloma hiahaom amamba epes satolom nelelemb kowagalalamami maloma hiahaom amamba esis gagatomami ma anis satilis sagasa'ma agof lu'wagofasami, hiahaom amamba ina mafi'i Ahamapa, owa'atin. Amamba mataga itap apa'e.* ¹⁷ Waf itapafi feloma hiahaom hiami epes ukup pigahafemami owagama a' higililam, apa' epen mamahina nigungaila basefa okom Godi, epen inimba a' nepe liflafi dondol.*

Bounai Kraisi nataga ea'

* **2:14:** Ro 8:7 * **2:15:** Ro 13:14; Je 4:16; 1 Pi 2:11 * **2:16:**
Mt 7:21; 1 Ko 7:31 * **2:17:** 1 Pi 4:7; Mt 24:5,24; 2 Jo 7

18 Ipa' alipipai ae'ipai ae' okom magamagailipai, dei' nemaf fa'i a' hi'ilaf. Fowa' ipa' pame' basefa bounai Kraisi na'i nogataga. Apa' dei' bousi ananisi hiasi asataga ea!. Ea' apa' mogawa dei' nogota ta'i ahi'ilata.* **19** Epes isimba sakwaha apa' ea!. Fowa' epes isimba ina a' ape'isi si'isi, owa!. I'i ape'isi si'isai, esis asope solomapa atapis. Apa' owa!, owa'atin. Esis asakwahepa ea!. Isimba atis dei' apa' mogawas andeande', epes isimba hiasi owa' mini'ap ape'ipia.*

20 Apa' ipa!, Krais nase'epa Ambal bu'unai Godi ea!. Dei' ipa' hipai pegawa basef endilisifi ea!. **21** Ipa' ina pelelama basef ifimba endilisifi ma dei' enda'mepago basef ifimbai, owa!. Ipa' apegawef. Ea' pegawa basef baso'afi ina fawalapa basef ifimba endilisifi, owa'atin. Isimba atis dei' anda'ago basef ifimba ma ipa!.* **22** Aman nagambaso'masi anen ami? Anen aman anamba nambaso'mas naga'i Jisas ina Krais, God nasapa'ana nagafi'ii, owa!. Aman anamba bounai Kraisi. Anen nowa' alafugama Ahamapa naloma Nogamana wapani.* **23** Epen ami negewa' alafuga ma Nogamanai, anen newa' alafugama Ahamana wapani. Ea' epen mamahina nagaso' opafa Nogamana, Ahamapa nepe nomona okom ananimi.

Ambal bu'unai Godi nawalipapa ma basef endilisifi

24 Basef ifimba fowa' dambadamba ipa' pagame'afi, ifimba hapilaef ukup ipe'ipi sisihif.

* **2:18:** Ap 20:30; 1 Ko 11:19 * **2:19:** 1 Ko 2:15; 1 Jo 2:27

* **2:21:** 1 Jo 4:3; 2 Jo 7 * **2:22:** Jo 5:23, 15:23; 1 Jo 4:15, 5:1; 2 Jo 9

I'i ipa' pihapila basef ifimba pali' pagame'afi ukup ipe'ipi sisihif, bola pepe sisihipama Nogamana noloma Ahamana mope atapim molomepa.* ²⁵ Krais analipapa basef endilisifi banagafi, anen atiasi noso'apa ambal namili mope andeande' liflafi. ²⁶ Ae' anda' basef ifimba fafe'mago ipa' awalapa wafa epes isimbai sa'i sogambaso'mipai.* ²⁷ Apa' ipa', Krais nase'epa Spirit Ambal ananinai. Ea' Ambal ananinai nape nalomepa ukup ipe'imi nomon. Isimba atis dei' ipa' ina gawa akepa ma anin open negawalipipa, owa'atin. Spirit Ambal Kraisi nawalipapa ma hiahawes hiasi ina nambaso'mapa, owa'. Dei' ipa' hapifa Krais pepe sisihipama anen.* ²⁸ Aho', ipa' awasi ae'ipai, ae' okom maimailipa a'i pendape sisihipama anen ama anaf notaga nondawalap, apa' ina ambagof awagof, owa'. Apa' mulutu banagepa ma naep ananipi.* ²⁹ Ipa' pegawa Krais anen bu'unai hilili' endilisi. Ea' pegawa anif basef wapani, epes mamahisa sagaila waf bu'wafi hilili'i, esis awasi Godi.

3

Dei' apa' mape awasi Godi

¹ Awasi! Ahamapa God okom maimailapa a'owa'. Ea' anennofalapa awasi ananipai. Endilisi atis, apa' awasi ananipai atepa. Isimba sandaiwa'ma Godi sagape itap apa'i, esis ina sogawa God, owa'atin. Isimba atis dei' esis ina

* ^{2:24:} Jo 3:15, 6:40 * ^{2:26:} Jo 16:13 * ^{2:27:} 1 Jo 3:2, 4:17

* ^{2:28:} 1 Jo 3:7,10

sogawa apa' wapani.* ² Ipa' alipipai, ae' okom maimailipa. Dei' apa' mape awasi Godi. Apa' anaf mope mi'imama, isimba atis apa' ina dei' mogawas, ata' owa!. Apa' owa!, owa'atin. Apa' a' mogawa, anafa Krais nogataga alihina, nemaf afamba, dao' a' motolona endilisi ea' motaga mope si'i anen nagape. ³ Epes mamahisa sape sagahafa anen nogafi'ii esis sape sandondomba opalef asasilifi lifilafi ma sogape bo'wes hilili' si'i Krais nagape. ⁴ Epen ami nanda' waf awafi, anin negesambala mu'uli Godi. Dei' main, waf awafi atef afamba esis satopa' mu'uli inimba.* ⁵ Ipa' pegawa Krais nataga ma nogakwaha waf awafi ape'ifi hi'igalaf. Anen ina nanda' anef waf awafi, owa'atin.* ⁶ Ea epen ami nape sisihin nagaloma anini, inimba ina ata' nape naila waf awafi, owa!. I'i epen mamahina nigaila waf awafii, okom ananimi ina a' nati Krais negawana, owa'atin.*

⁷ Ipa' alipipai ae'ipai, solawaipa andeande! Na'amba anin epen a' nembaso'mepa. Epen ami nenda' waf usi'ififi, anin nape hilili' si'i Krais nagape.* ⁸ Satan nanda' waf awafi fowa' dambadamba nafl'i nafl'i dei' ata' nape atapina. Ea' i'i epen mamahina nenda' waf awafi atapin negapomafi, anin epen Satani. Nogamana Godi nafl'i nataga nandawalapa main? Ma nogahambombaga maol Satani.* ⁹ Epen ami nagape awani Godi, anin ina nape nanda' waf awafi atapin,

* **3:1:** 2 Ko 3:18; Fl 3:21; Jo 1:12-13; Jo 16:3 * **3:4:** 2 Ko 5:21;
 1 Pi 2:22-24; 1 Jo 2:2 * **3:5:** Ro 6:1-2,14; 1 Jo 3:9 * **3:6:** 1 Jo
 2:29 * **3:7:** Jo 8:44 * **3:8:** 1 Jo 5:18

owa'atin. Dei' main, okom Godi a' nape opaf ananifi ea' anin a' awani Godi. Ea' anin ina la'ifina ata' nenda' waf awafi atapin, owa'atin.
10 I'i apa' mi'i mogawa epen mamahina, nogamana Satani a mamahina Godi, apa' mogogawas na'amba. Epen ami owa' nenda' waf usi'ifia ma owa' okom mogamogaila alipisi ananisia, anin ina epen Godi, owa'atin.*

Wafa nomonas sindaima atin endilisi ma sahin owan

11 Basef fowa' dambadamba ipa' pagame'afi ifimba. Apa' a' ukup pindaila esis sahin owan endilisi.* **12** Apa' ina a' mila waf Kaini, hapaifi. Kain wambota aman aunai Satani ea' naha owamana Abel naga!. Dei' maina nahana nagaga'? Anen kowalana ma maol bu'wani owamana nanda'ani dei' nahana naga!. Apa' maol ananini awasini atin.* **13** Ipa' sahin owan ae'ipai, i'i esis sagape itapi sogowa' alafugaha Godi sindaiwa'mepa, ipa' ina a' gogolagalasipa, owa'i.* **14** Apa' ukup pagapagaila esis sahin owani, isimba apa' mogawas dei' a' makwahef ea' waf afamba ga'ifi ea' mataga mofa' ambal namili. Dei' main? Apa' ukup paipaila esis sahin owan endilisi. Epen ami owa' okom mogamogaila anin sahin owania, anin ata' nape atapina waf ga'ifi.* **15** Epen ami okom numbutima sahin owan ananisi, anin si'i naha anis amam nematawa sagaga'i. Ea' ipa' pegawa epen naha

* **3:10:** Jo 13:34 * **3:11:** Jen 4:8 * **3:12:** Mt 5:11-12; Jo 5:18-19 * **3:13:** Jo 5:24; 1 Jo 2:11; Mt 5:21-22 * **3:14:** Re 21:8

anis sagaga'i, anin ina dei' a' nefal ambal namili lapaina negape andeande' lifilafi, ata' owa'atin.* **16** Waf afamba apa' ukup pigapigaila anis da-iasafi mogogawaf na'amba. Krais nakwaha ambal ananili ma nagatopalopapa. Isimba atis apa' wapani a' mondokwaha ambagof ape'imi ma mogatopalopa sahin owan ape'isi.* **17** I'i anin epen hiahaom hiamini ma nigati sahin owan hiahaom akani ma anin owa' okom mimila sahin owana, epen inimba ina okom maimaila God, owa'atin. Dei' maina epen inimba naga'i, "Okom ae'ami magamagaila God"? Owa'atin, anin nambaso'am.* **18** O, alipipai ae'ipai, apa' ina a' ukup paipaila esis alipisi ma muga'ipasa basefa malogof atogof wafigufi, owa'atin. Apa' ukup pindapindaila esis endilisi a' motopalopas monda' waf bu'wafi endilisifi mihimba'masaf.

Epen nagahapifana endilisii, anin ina ombal mahana naep Godi, owa'. Anin banagen nape.

19 I'i apa' monda' waf afambai ma ukup pipila sahin owan ape'isi, apa' mogawa maila basef endilisifi. Waf afamba fanda' opalef ape'ilifi awanelefa mogape banagepa ma naep Godi. **20** I'i malogof fagape opalef nomoni fi'ipapa fi'i apa' manda' waf awafi, God dembinai a' nikila' ukup ape'ipi ea' nagawa hiahaom hiami.*

21 Alipipai ae'ipai, ae' okom maimailipa. I'i malogof fagape opalef nomoni owa' fowalapa anef waf awafi fi'ipapaia, dao' mefe'ma God

* **3:15:** Jo 13:1; Ga 1:4; 1 Te 2:8 * **3:16:** Diu 15:7 * **3:17:** Je 2:15-16 * **3:20:** Hi 4:16

opalef ape'ilifi awanelef mope banagepa.* ²² I'i apa' mi'i mondabeten mogahali'ana ma anis hiahawes, anen nogaso'apasi. Dei' main, apa' maila okom ananimi ea' manda' hiahawes anen sonahana ma apa' monda'asi.* ²³ Basef banagafi Godi fa'i na'amba fa'i apa' mondahapifa agol nogamanai Jisas Krais ea' ukup ape'ipi pin-dapindaima atin si'i anen naga'ipapa dindinip.* ²⁴ Epen mamahina nigaila basef Godi banagafi, anin nepe sisihin neloma God ea' God nope sisihina noloman. Anen a' naso'apa Spirit Ambal bu'unai ananinai ea' dei' mogawa God nepe sisihina nalomap.

4

Basefbiafifa Ambal bu'unai Godi naloma ambal aunai lagambaso'ami

¹ Alipipai ae'ipai, amom profet magambaso'ami mafe'agon anamba itap hiagoma. Ipa' ina pihapifa epes isimba hiasi saga'i, "Ae' Ambal bu'wali Godi nagapauwai." Owa!. Ipa' ata' pegwamba ambagof amamba hiami pendendomam ama pegegawa amom mataga maf'i Spirit Ambal Godi a'a owa!.* ² Ipa' pegegawa Ambal Godi na'amba. Epen mamahina ni'i, "Endilisi, Jisas Krais nafi'i nataga epen endilisinai", epen inimba Ambal Godi napain opaf ananifi.* ³ Apa' epen ami owa' nigal'ias na'ambai ma Kraisia, Ambal Godi ina nepe anin,

* **3:21:** Mt 21:22 * **3:22:** Jo 6:29, 13:34 * **3:23:** Ro 8:9;

1 Jo 4:13 * **4:1:** 1 Ko 12:3; Mt 7:15; 1 Jo 2:18; 2 Jo 7; 1 Te 5:21

* **4:2:** 1 Jo 2:18; 2 Jo 7

owa'atin. Ambal nagape open inimbai anen bounai Kraisi. Fowa' pagame' basefa Spirit ambal bounai Kraisi nogafi'i, dei' a' nafi'i nape ea' itap apa'e.*

⁴ Ipa' alipipai ae'ipai, ipa' epes Godi ea' panda' wandaf paloma amom profet awami magambaso'ami pikila'am. Dei' main, Ambal Godi nagape nomon opalef ipe'ilif anen banagonai nikila' aman aunai nagape itap apa'ii.* ⁵ Epes isimba sagaila waf itapafii saga'i basef itapafii atifii, epes itapasi sahapifas. Dei' main, esis isimba itapasi atis.* ⁶ Apa' apa', epes Godi. Epen mamahina negegawa Godi, anin neme' basef ape'ifi. Apa' open ami owa' open Godia, inimba ina name' basef ape'ifi, owa'atin. Ea' isimba atis dei' ametal inimba nihimba'mapa ma mogogawa epes isimba. I'i Ambal Godi endilisinai nupais, aseme' basef ape'ifi. Apa' i'i ambal nagambaso'ami nupais, ina seme' apa', owa'!*

God okom maimailapa a'lowa'

⁷ Ipa' ae' okom magamagailipai, apa' atepa a' ukup pindaima atin. Dei' main, waf afambai fafi'i God. Epen ami okom magamagaila sahin owani, anin awani Godi ea' dei' negawa God a' naila basef ananifi.* ⁸ Epen ami owa' okom mogamagaila sahin owania, anin ina negawa God, owa!. Dei' main, God okom magamagaila epes hiasii.* ⁹ God a' nihimba'mapa anen okom maimailapa na'amba. Anen nasapa' Nogamana ananinai

* **4:3:** Mt 12:29; 1 Jo 5:4-5 * **4:4:** Jo 15:19 * **4:5:** Jo 8:47

* **4:6:** 1 Jo 2:29 * **4:7:** 1 Jo 4:16 * **4:8:** Jo 3:16

atotona nafil'i itap apa'e ma apa' mogofa' ambal namili ma anen.* **10** Basef kofagefa ma God okom magamagaila ape'i ifimba. Apa' ina mali' ukup paipailana, owa'atin. Anen nali' okom maimailapa ea' nasapa' Nogamana ananinai nafil'i ma nanda' okom numbutimi Godi maga' nakwaha waf awafi ape'ifi okom magaso'anaf.* **11** Ipa' alipipai, waf afamba atef fihimba'mapa God okom maimailapa a'owa!. Ea' apa' wapani ukup pindaima atin endilisi.* **12** Ina anin epen nati God, owa'atin. I'i apa' atepa ukup pindaima atin, God nope sisihina ma apa' ea' okom ananimi magamagaila ape'i atiasi mope molomapa opalef ape'ilifi nomona monda'as na'amba atin ukup pindaima.*

13 Dei' apa' mogawa ea' mape sisihipa maloma God ea' nape nalomapa. Dei' main? Anen naso'apa Ambal ananinai nape nalomapa.* **14** Ea' apa' mogawa Ahamapa nasapa' Nogamana ananinai ma nowambilai epes hiasi sagape itapi nokwahomas waf awafi sogotanimai ma anen. Apa' mati hiahawes isimba ma anen nowambilai epes sogotanimai ma'ipasas.* **15** Epen ami negawalapa basef alihigma niga'i, "Endilisi, Jisas anen Nogamana Godi", God a' nope sisihina noloman, anin wapani nape sisihina anen.* **16** Isimba atis dei' apa' mogawa mahapifa God anen okom maimailapa a'owa!.

* **4:9:** Ro 5:8-10; 1 Jo 2:2 * **4:10:** Mt 18:33 * **4:11:** Jo 1:18; 1 Jo 2:5-6 * **4:12:** 2 Ko 1:22; 1 Jo 3:24 * **4:13:** Jo 3:17 * **4:14:** 1 Jo 5:5 * **4:15:** 1 Jo 4:8

God anen kofagonama okom magamagaila epes hiasii. Epen ami nepe okom maimaila God naloma epes hiasi atapin, anin nepe sisihin naloma God ea' anen nepe sisihina nalomana.* ¹⁷ Waf ukup pigapigaila esis Kristen alipisi a'owa', afambai fataga be'ef endilisi ma apa' ina a' mondafa'ma nemaf afamba lu'wafi ma God nogowalogapa, owa'atin. Dei' main, anen napaipa nomon, ea' mape itap apa'e si'i Krais nagape. Apa' ina ombal mahapa ma nemaf afamba, owa'atin. ¹⁸ God okom maimailapa, apa' wapani ukup paipailana. Ea' ina ombal mahapa, owa'atin. I'i waf afambai fetaga be'ef endilisi ma apa', afamba ea' fatofa waf ombal magahapamafi fewala hi'alaf. Dei' main, kofagema ombal magahas, ombal mahasa hiahaom akafimi anaf God nowalogasa waf awafi nogaso'asami. Epen mamahina ombal mogahani, waf okom mogomogaila God ina fataga be'ef endilisi ma anin, ata' owa'atin.

¹⁹ God nali' okom maimailapa a'owa'. Isimba atis dei' apa' ukup paipaila anen naloma epes hiasi wapani. ²⁰ I'i anis epes si'i, "Apa' ukup paipaila God," ama i'i esis ukup wandafuma Kristen alipisi, epes isimba sagambaso'ami. Dei' main? Ina anin epen atitin a' nati God, owa'. Epen ami nati alipini ananini ma owa' okom mogomogailania, epen inimba ina la'ifina okom mogaila God owa' nogatolona naepia, owa'atin.* ²¹ Basef ifimba Krais naga'ipapaef dindinipi ifimba. Epen ami okom magamagaila Godi, epen

* **4:16:** 1 Jo 2:28 * **4:20:** Mt 5:44-45; Mk 12:29-31

inimba okom mondaila sahin owan ananisi wapani.

5

Epes sagahapifanai satalogofa waf itapafi

¹ Epen mamahina nagahapifa Jisas anen Krais God nasapa'ana nagafi'ii, epen inimba awani Godi. Ea' epes mamahisa ukup pagapagaila ahamas atotonai, esis ukup paipaila awasi ananisi wapani.* ² I'i apa' ukup pipila God mila basef banagafi ananifi, atiasi waf afambai apa' mogawa ukup paipaila awasi ananisi wapani.* ³ Waf kofagefa ma apa' ukup pigapigaila Godafi afamba. Apa' mondaila basef lo banagafi ananifi, ina ahifif a'owa', owa'atin.* ⁴ Dei' main, awasi mamahisa Godi isimba la'ifis sagatalogofa waf itapafi. Apa' mahapifa God dei' waf afambai apa' mikila' wandaf matalogofa waf itapafi awafi.* ⁵ Epen ami nikila' wandafa waf awafi ea' natalogofa waf itapafi? Epen nagahapifa Jisas naga'i anen Nogamana Godii, anin atin nikila'af.*

God nawalapa basef alihifa Nogamana Ananainai

⁶ Jisas Krais ma'una aman anamba a' nafi'i. Ea' anen nofa' baptaisa embel, ama main sahana naga' esimbrel ananimbeli balo. Anen ina nafi'i ma waf embeli atef, owa!. Anen nafi'i ma waf embeli esimbrel endilisifi. Ambal bu'unai Godi kofagonama waf endilisifi hi'alaf. Ea' Ambal

* **5:1:** 1 Jo 4:15 * **5:2:** Jo 14:15,23-24; 2 Jo 6; Mt 11:30 * **5:3:**
Jo 16:33 * **5:4:** Ro 8:37; 1 Jo 4:4 * **5:5:** Jo 1:29-34

anamba nawalipasa basef ifimba ma Krais endilisifi.* ⁷⁻⁸ Spirit Ambal Godi naloma embel esimbel isimba wanifis sawalapa basef kofagefa atifif.* ⁹ Apa' mahapifa basef epes sagawalipasafi. Apa' basef God nagawalipapafi banagef fikila' basef epesi. Dei' main, basef ifimba fa'i Nogamana ananinai.* ¹⁰ Ea' epen ami nagahapifa Nogamana Godi, basef ifimba endilisifi fape nomon okom ananimi. Apa' epen ami owa' nigahapifa Godia, epen inimba na'i God aman nagambaso'ami. Dei' main, epen inimba ina nahapifa basef ifimba God naga'ifa Nogamana ananinai, owa'. ¹¹ Ea' basef ifimba endilisifi na'amba. God a' naso'apa ambal namili ma mogape andeande' liflafi dondol. Ambal namili alamba anen naso'apala Nogamana ananinai atona.* ¹² Epen ami negape sisihina negaloma Nogamanai, inimba dei' nefo' ambal namili. Apa' ami owa' nepe sisihina Nogamana Godia, inimba ina nefo' ambal namili ma negape andeande' liflafi, owa'atin.*

Apa' mogawa ea' apa' mofa' ambal namili

¹³ Ae' anda' basef fafe'mago ipa' pagahipifa agol Nogamana Godi. Anda'efa ipa' pegegawa dei' apefa' ambal namili pape andeande'!* ¹⁴ Apa' mogawa, i'i apa' mila okom Godi atom mondabetena hiahawes mamahisa hiasi, anen atiasi nogame' beten ape'inii. Ea' nemaf mamahefa mefe' felefele'ma anen mondabeten, ina ombal mohapa ma anen, owa'. Ukup ape'ipi pepe

* **5:6:** Jo 15:26 * **5:7-8:** Jo 5:32-37; Jo 8:18 * **5:9:** Ga 4:6

* **5:11:** Jo 3:36 * **5:12:** Jo 20:31 * **5:13:** Jo 14:13, 16:23; 1
Jo 3:21-22

banagepa. ¹⁵ Apa' mogawa anen nagame' betena hiahawes mamahisa dei magahali'anamasi. Ea' mogawa dei' a' mape si'i mogofa' hiahawes isimba ea'i.*

¹⁶⁻¹⁷ Waf hiafi hi'alaf owa' usi'ifia afamba waf awafi. Epes sanda' waf awafi sawala basef Godi banagafi. Apa' waf hiafi awafi ina fenda' epes sogaga' lamonasi, owa!. I'i anin open niti anin sahin owan ananini nenda' anef waf awafi owa' fenda' open inimba nega' higililana, open inimba nanda' waf afambai a' nendanda' betena Goda, nogaso'an ambal namili. Endilisi, anef waf atetef awafi fanda' epes sogaga' lamonasi. Ae' ina a'ipipa ma pendabetena epes sanda' waf afambai, owa!.*

¹⁸ Apa' mogawa epes mamahisa sagape awasi Godi, esis ina sape sanda' waf awafi atapis, owa'atin. Dei' main, nogamana Godi numafias andeande'ma banagami ananimi ma aman aunai ina nohambombagas, owa'atin.* ¹⁹ Apa' mogawa apa' awasi Godi, apa' isimba owa' awasi Godia sape lafela aman aunai Satan dembinai asasinai.*

²⁰ Apa' mogawa Nogamana Godi nafi'i ma noso'apa gawa ma mogogawa anen God endilisinai. Apa' mape sisihipa ma anen endilisinai naloma Nogamana ananinai Jisas Krais. God anamba endilisinai anen kofagonama ambal namili mogape andeande' lifilafii.*

²¹ Awasi ae'ipai, ipa' pewa' alafugaha god baso'amunai ea' pendape banagepa.

* **5:15:** Mt 12:31 * **5:16-17:** 1 Jo 3:9; Jo 17:5 * **5:18:** 1 Jo 4:6 * **5:19:** Jo 17:3 * **5:20:** 1 Ko 10:14

**Basef Bu'wafi Godi
The New Testament in the Mufian Language
Nupela Testamen long tokples Mufian long Niugini**
copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 11 Nov 2022 from source files
dated 9 Oct 2020

9d2b07f2-4ac7-545a-943c-e16df691ef3f